

SUDAC

Lipi pozdrav ljudi mili
Veseli i zdravi bili
Znate da vas jako volin
I za malo mira molin

Čut ćemo kij na tapeti
I čaj zgrišil vavon leti
Optužnica sad se diže
Kij gluh neka stane bliže

Dok još nisan jako nabit
Pozdrav šaljen ne smin zabit
Na se mile strani svita
Kadi god se ovo čita

Se od Ria do Sibira
Sakomure kij z Bribira
Va rudniki va Afriki
Ili vrućoj Ameriki

I v Sidneji i v Čikagi
Si Bribirci meni dragi
Običaje vole stare
Mesopusta i mačkare

Ja nen zatrt tradiciju
Našu staru šentenciju
Mislin da ću ovo pisat
Dokli buden mogal disat

Sad pozdravljan novu vladu
Ulivaju niku nadu
Bit će bolje nego čera
Verujen va Sanadera

Gremla dalje Ivo zija
Š njin je sad i kumpanija
Seljaci i liberali
Si su karte na stol klali

Samo ti si Bribir grade
Kontra sake naše vlade
V tebi još za sakog mraka
Sviti zvezda petokraka

I tvoju vlast ja pozdravljan
Na tapet ih valje stavljan
Veli minus njin od mene
Dok se nešto ne pokrene

Da su bar problemi stali
Kad smo kulu oplakali
Nesrića nas stiže druga
Kroz Bribir će proć i pruga

Čekali smo mandatara
A dobili „SKRETNIČARA“
Ja vas pitan jel on skrenul
Kroz Vinodol prugu skrenul

Šalu pustimo na stranu
Slušat ćemo i obranu
Ča god reku nij za lazna
Spravljena muj smrtna kazna

TAMBUR

ABUKAT

Red je **na me** da se javin
I od reda sih pozdravin
Stel vi čuli benu staru
Ča drobi o „SKRETNIČARU“

Odgovorit valje oču
Na tu tvoju bedastoću
Hodi krstit se u popa
Pruguj zmislela Evropa

Nacrtali mudri fanti
Prugu va tri varijanti
Daj to spas za Ričku luku
Triba ljuden stisnut ruku

Zadnje čujen pruga smira
Hodit okolo Bribira
Puno let već imaš v riti
Optužbu va vodu hiti

Krivca ti poišći dalje
Njega oslobodi valje
Nij kriv zavo naše stanje
Ča seremo puno tanje

I ča pobenave ženi
Kad v butigi vide ceni
Onda akcije ščekuju
Jeftinije da kupuju

Oćel Bože i v kon roki
Prestat borba na Istoki
I ćel zibrat Amerika
Črnoga za predsjednika

Kako sada stoje stvari
Ili črnac il Hilari
Ki god bude nij ni blizu
Rješjenja za svjetsku krizu

Stvar se vele vrti cela
Oko cene od barela
Nafta stanje dirigira
A cena joj galopira

Kadi god su derivati
Tuj obično zemlja v rati
Vjerski sukobi se vode
Love pušku čin se rode

Alkaida, teroristi
Ciljevi su njimi isti
Da ubiju i raznesu
Da se drugi zbog njih tresu

Nij lahko va celon sviti
Nismo samo ovdi v riti
SKRETNIČARA ti ne krivi
Ostavi ga neka živi

TAMBUR

SUDAC

Poškropi se vodun svetun
I v guzicu lupi petun
Pokušavaš ovdi sprotu
Smutit narod i porotu

Ona stvar me uprav boli
Ki se kolje tamo doli
Nego mi se dižu tlaki
Ča će ovud tulit vlaki

Posebno me to nervira
Ča nećemo imit mira
V Rošći bit će zavoj oštar
Tamo kadi živi poštar

A onda će znad tog sela
Bušit dva do tri tunela
Al će lipo nanat dica
Kad bu tresla se Slipica

Još se dela va toj zoni
I pista za avioni
Za vrhon je lokacija
Al ne gradi ga armija

Željko Tomić investira
To interes nij Bribira
Totu ote sletat k Želji
Bogatiji prijatelji

Gazit oće priko šina
Pišice do Kosavina
Pa te v dvori igrat tenis
I v bazeni močit penis

Od vlakih i avioni
Nećeš čut kad polne zvoni
Lipi centar Vinodola
Postat oće metropola

Još se i o tomu zbori
Vjetrenjače bit će v gori
Davat struju jeftiniju
Dal te tvrdnje vodu piju

Il to niki jaja nesu
I vlastitu pune kesu
Dal imaju to na umu
Da te šundrat našu šumu

Sul va igri veli novci
I čote in nato lovci
Vjetrenjače na čistini
Nij medvida ni veprini

Energija ta se nova
Bori protiv krivolova
Instalirat će kamere
Da se tu ki ne posere

„SKRETNIČARUJ“ valjda drago
Ča će z gore uteć blago
Manje ote plazit zmije
Se zbog vjetro – energije

TAMBUR

ABUKAT

Ako tij do sebe stalo
Ostavi se lovcih malo
Postigli su pravu formu
Prehićuju saku normu

Ča nišane to otresu
Oskudice nij va mesu
Oboren je rekord novi
Devet prasac v jednon lovi

S rezultaton tin se mirin
Bolje more samo Kirin
On s Markačen rekord drži
Sad se ovaj v Hagi prži

Od tih devet reć se mora
Tri su delo mlajeg Čora
A jednogaj puka srića
Tirala na Anušića

On nišani, dva put zvekne
Da ta vepar ne utekne
Pogodil gaj ma nij pravo
Još mu zgljeda jako zdravo

Još jednuč gre v blago pucat
Pa će mu se prestat štucat
Al tuj jedan problem mali
Metki doma su ostali

Gljeda Mladen desno livo
Prase još skakuće živo
Pa Alena zove Peku
Da napusti svoju čeku

Nij šlo prase predaleko
Lahko gaj dokrajčil Peko
Pa su prije neg poledi
Otpeljali prasci k Nedi

Tamo ote derat sada
I zet komu ča pripada
Vito brzo angažira
Da Milorad to tranžira

Nis bil gori ma mi prave
Jedan daj pobiral glave
Toj za širu familiju
A uše za žaladiju

Jadranko će zet sitnicu
Sin mu voli žigericu
Da jist neće nij ni slutil
Kad va Selca sej uputil

Parkira spred radioni
Na uzbunu zvono zvoni
Znoj ga totu blagoslovi
Vrićicuj zabil na krovi

Kij za njega vozil prvi
Spazi cistaj puna krvi
Trag ga vodi na vrićicu
I zgaženu žigericu

Zadnjaj bila to krivina
Ispod Boži Juričina
Jadranko se i sam smije
Kad va domi gemišť pije

TAMBUR

SUDAC

Mislili bi da san skrenul
Kad ovo ne bin spomenul
V Dragaljini na Rivini
V akciji su dva kucini

Doček je bil tu veliki
Ote in prit gosti z Riki
V okruženju jednon užen
Sestra oće prit sa mužen

Ne znan ki tu koga krivi
V kući jedan lovac živi
To lovački kucki nisu
Imenovat nen čiji su

Ovo doznal san od Šimca
To su kućna dva ljubimca
Ulovili ne bi zeca
Zač su teži od dva telca

Prišli gosti z Riki zdravi
Imeli su doček pravi
Ma ne pravi nego fini
Va dvori su dva kucini

Darinka va pomoć zove
Kucki ju za grkljan love
Dvi su pasje te gubice
Izgrizli joj jako lice

Biži z dvora Veljko reče
Darinka na put uteče
Ovoj borba bila prava
Teče selon sa krvava

Hote ljudi niki mora
Pripeljajte mi doktora
Nasrid sela sela na rit
Još bi mogla iskrvarit

Veljkoj ostal sam va dvori
I sa dva se kucka bori
Bile su to vražje muki
Izgrižene su mu ruki

Koda ga sa nožen riže
Ma pomoć iz kuće stiže
Domaći su jedva bili
Dva ljubimca umirili

Nij to ljudi bila šala
Dospeli su do špitala
To su bile grde slike
Skrpali ih kot ratnike

Veli Veljko dobili smo
I preteće jedno pismo
Sretni bute da ste živi
Ki sad totu koga krivi

TAMBUR

ABUKAT

Spomenimo ča sej bilo
Arbičinu dogodilo
Ča čovik doživit more
Kada vozi drva z gore

Prikolica napunjena
I za golf je zakučena
V šentenciji tako piše
Nakrcana je previše

Vidi daj pretovareno
Pa gre zato na Pleteno
I va glavi Tona sanja
Nizbrdicaj tamo manja

Tona šofer nij od čera
Misli boljej prik' Batera
Bilaj ovo vožnja živa
Prikolica jako riva

Misli su mu teške bile
Golfu brenzi jako cvile
Prikolica ga zanaša
Skuhala sej grda kaša

Više cisti čaj za smeće
Auto mu va kraj skreće
Ne skreće ča tona voli
Nego nima već kontroli

Biloj stvarno ajme meni
Zaustavil sej va steni
Stena tvrda, nij to spužva
Golf se totu sasin zgužva

Golfu farbanon va belo
Nijedno nij staklo celo
Tonaj totu bil pošteđen
Van je zišal neozleđen

Prikolica otkučena
I na golfa naprcena
Onako za majku milu
Kad konj skoči na kobilu

Se to stoji pokraj puta
Drva sakud razasuta
Tonij totu briga prva
Kako doma odvest drva

Golf je totu bil otpisan
I iz popisa izbrisan
Ne more se golf da sredi
Još jedino motor vredi

Dugo Tona vozi kola
Pije malo alkohola
Glavno da nij štete veće
Prigovarat sinu neće

TAMBUR

SUDAC

Lipo smo se zabavljali
Subotun ovdi va Sali
Kot uvik je Gradac selo
Znelo stvari na videlo

Mačkarali su se totu
I va Bribirsku sramotu
Va se čaj narodu milo
A ovdi sej ugasilo

Već odavno tu nij brici
A pred malo ni mesnici
A ni banki naše stare
Nimamo ni planinare

Streljani ni „Viševice“
Na Čokovi utakmice
A od lani to ste čuli
Ni stupićih nij na kuli

Zatoj z Graca ta elita
Oživela druga Tita
Puno malih pionira
Oj Kozaro Vlade svira

Tancalo sej po parketu
Prnesli su i štafetu
I Jovankaj totu bila
Na njoj halja čista svila

Na nogah je sala bila
Da bi Tita pozdravila
Videli su i na šanku
Druga Tita i Jovanku

Na veselje udri brigu
O Gracu bin mogal knjigu
Nikad nisu mi na troški
Pa ću krenut kronološki

Žedna nisu bila usta
Za letnjega mesopusta
Na pilanu gremo sprotu
Zadnju srpanjsku subotu

Prava pučka veselica
Mačkarani starci, dica
Tamburaši ritam daju
Si tancaju si pivaju

Još nij bila prva ura
Kad sej stala prava bura
Nosi čaše i kartoni
Zvučniki i mikrofoni

Prije nego dan se beli
Totu vozil sej i reli
Predstava toj bila lipa
Kad je Alen sel va džipa

Jel bil va kakovon jadu
Krenul džipon na ogradu
V prvoj šlajfa niš ne koči
Bura nosi pesak v oči

Tu nij bilo veće šteti
Pa ćemo i vovon leti
Hopsat tamo na oprti
Karneval će bit četrti

TAMBUR

ABUKAT

A ja se gren vrnut malo
Kad na Graci sej pucalo
Martinčići kćer udaju
A seljani ju ne daju

Srcu oduška su dali
Pranjgu na srid sela klali
Nataču se tu va vinu
I čekaju otkupninu

Za ki kurac otkupnina
Kad imaju već i sina
Neg motornu love pilu
Ako triba te na silu

Suza brže sej sitila
Na pranjgu sej opružila
Neda da se pranjga pili
Mladu nisu još kupili

Euri se žepa vade
Jer inače nima mlade
Si susedi se skupili
Jelenu su otpratili

Ali još ih grlo srbi
Gredu skočit i do Vrbi
Va duri su i va moli
Valcer tancaju na stoli

Draško vodi Suza prati
A drvo pod njimi pati
Puca stol va par komadi
Ma Renata se ne jadi

Si su sad va jednon smihi
Gredu popit i u Tihi
Kad su našli dno bocunu
Zvoni zvono na uzbunu

Dozaj bila tu prejaka
Ubila dva imenjaka
Naježila sin sej koža
Obadva se zovu Joža

Jedan Čalton majko draga
Drugi šerif je s Čikaga
Požarićuj stanje bolje
Hrče koda ga se kolje

Drugomu se loše piše
Mili Bože ni ne diše
Misle da muj zel vrag sriću
Brže važgali su sviću

Ruki su mu prekrížili
I uz njega se molili
Ćuk će valje reć se mora
Gremo sina zvat Davora

Sul ga v octi masirali
Il pod zajik čagod klali
Očej oprl zraka lovi
Suza nosi dupljak novi

Čalton bil sej ohovistil
Još dvi čaše vina slistil
Sakaj pisma otpivana
Nij tribalo lagamana

TAMBUR

SUDAC

Okol toga da ne duljin
Ja gren sprotu va Poduljin
Jakoj zdrava doli klima
Tu frizerka stado ima

Lipo pasu joj ovčice
U materi njene Mice
Mira š njmi šetat voli
Tako kile gredu doli

A kad misec se upali
Ovce zaključa va štali
Neka lipo tu počinu
Ona gre spat na Rivinu

Kad va niko gluho doba
V nikomu se budi zloba
Kako nazvat tu budalu
Usrid noći važge štalu

Štala gori ovci bliju
A susedi sanak sniju
Ovčji plač Maricu budi
Zlice s kuće pa se čudi

Teče k štali ključa nima
Nagutala tu sej dima
Oganj taj ne more gasit
Otela bi ovce spasit

Pa teče po majku Micu
Po ključ za oprit štalicu
Vatrogascih tad su zvali
I oprli vrata v štali

V Poduljin pritekclaj Mira
Vatrogascih nij z Bribira
Dok su naši se skupili
Crikvenički pogasili

Gljeda Mira brojno stanje
Četiri janjčića manje
Kad su bili bliže zori
Stižu MUP-a inspektori

Hladnokrvno mirne duše
Pitaju dal ovci puše
Il nikomu štala smeta
Pa juj važgal od dišpeta

Policijaj efikasna
Činjenica simi jasna
Napuštaju to strnišće
I danas se krivac išće

Miraj janjci prežalila
Smještaj ovcan obnovila
Sad su ovci kot v hoteli
Toj najlipša štala v seli

Ispred kuće majki Mice
Ovčji hotel s tri zvezdice
Voli svoje ovci Mira
Kadagod je i frizira

TAMBUR

ABUKAT

Ja ti više volin prasci
I u ženske dobri sasci
Početak je ovoj priči
Dva su prasca gori v Liči

Žara Tus jej rezerviral
Soldi za nje kapariral
A Ivanka poč će s dicun
Po nje golfon s prikolicun

Gre sin Miro i Ivanka
Znadu mesto od sastanka
Dosti brzo v Lič su stigli
V prikolicu prasci digli

Pa s ceradun je pokrili
Da se ne bi namočili
Još su se i Žarun čuli
Kada doma su krenuli

V Zelemišalj golf je stizal
A prasac ceraduj grizal
Načinil je školju velu
Pa preskočil i kaselu

Kočnica se valj stišće
Odbjegli se prasac išće
Crklaj da bu pizdarija
V mobiteli baterija

Pomoć dozvat se ne more
Pa se sami s blagon bore
Otac dela i ne sluti
Da su oni još na puti

Prova doma zazvat Žara
Ma niki ne odgovara
Zvoni niš mu jasno nije
Već bi prišli z Austrije

Va potragu sej uputil
I kolege s posla smutil
Iskat gre va nizbrdicu
Auto i prikolicu

Hajkaj brzo ta finjena
Našli su se sin i žena
Valje su in ruku dali
Da bi prasca nazad klali

I dvi daski zakucali
Da još ki put ne bi stali
Već je bila kasna ura
Žaru čeka nova tura

A prasci to reć ću sprotu
Više nisu na životu
Ucvirki i kobasice
Nete bižat s prikolice

TAMBUR

SUDAC

Na KUD ću potrošit slovo
Tamoj uvik ništo novo
Radne nošnje smo sašili
Na olimpijadi bili

Stari sporti najmiliji
V Karlovačkoj županiji
Pokret z Vrbi, v busi klima
I za popit sega ima

Litrica se prazni šesta
Srića nima doping testa
Oćemo se s kolon dičit
I va sporti se takmičit

Sunce žarko nan prkosi
Prvo Pešun travu kosi
Bodi nan se totu broje
Pojedinci jedva stoje

Još litrica dobrog vina
Već je druga disciplina
Nij pametna nego glupa
Triba pet se na vrh stupa

Darijoj zel taj zadatak
Alij ostal malo kratak
Zaletel sej poput vetra
Popel dva sej centimetra

S namij publika va transu
Vidimo v konopi šansu
Više nećemo se zezat
Konop oćemo potezat

Dara poštar nas priprema
I taktiku grdu sprema
Na ho - ruk si potegnite
Na konop se polegnite

Borimo se na proplanki
Na nogah su nan opanki
Pa nan se livada kliže
I porazu se smo bliže

Bitkaj totu izgubljena
Davor pal je na kolena
Za nas je to samo šala
Mi ne gubimo morala

Kašnje smo na pozornici
Mi postali pobjednici
Tamburali i pivali
Lipi tanci otancali

Na nas nigdir se ne žale
Sakuda nas ljudi fale
Još va općini da shvate
I da bolje nas poprate

TAMBUR

ABUKAT

Subotnjemu zimskom dani
Si od KUD-a su pozvani
Muški, ženi a i dica
Va Krasnon je obljetnica

Pet let slave nen to pobit
Ne more se ljudih odbit
Pakuju se prija bure
Gusle, gajde i tambure

Puten nisu puno pili
Va busi su i sopili
Gostoprimstvu nima fali
Tu su nič i oglodali

Od jušice do kolača
A Udruga Krasno plaća
Sastalo sej društvo velo
Odigranoj tu i prelo

Se bez členu i bez fugi
A aplauz bil je dugi
Va Krasnarskoj lipoj sali
Dva tri kola otancali

Kad je lipo se finilo
Pit sej dalje nastavilo
Jednih vino pismi vuče
A nikoga brigi muče

Jedna žena nima mira
Ja va bus ne gren bez sira
Poznat je va celon svitu
Dal za prisnac ili pitu

Neka se i ova čuje
Trejset kil se naručuje
Kilaža va glavi svira
Sirana se tu opira

Rešit ću vas ja te muki
Vlasnik s gušton tare ruki
Dvi kila za žuntu daje
Za narodne običaje

Trejšet kil tu nij tereta
Niti ženi snig ne smeta
Kij to kupil ne znan ni ja
Mi se čini daj Marija

TAMBUR

SUDAC

Letnjej doba lampaš sviti
V gorij škuro kot i vriti
Samo v kući oganj plazi
Na Stankovon gori lazi

Piškulića neće srića
Dela poli Peranića
Kamini on sada zije
Kot ča delalo sej prijje

Nij ga zidal da muj prvi
Zidarijaj njemu v krvi
Totu frajka i uživa
Kada tada i zapiva

Jednog dana eto vraga
Samo makal sej od praga
Opral alat i vilbaru
Po minažu gre va karu

Ali nič mu neda mira
Kućne vrata on opira
Kad va kući mili Bože
Samo luster još se vože

Mili Bože dal to sanja
Gori kuća kot plasanja
Spilberga nij da to snimi
Ko s koksare tu se dimi

Vatrogasci nisu totu
Nek po Krojca teče sprotu
Vatra nij se jako digla
Već je pomoć bila stigla

Da ne bude vela graja
Vladej spasil svoja jaja
Ne triba mu drugi smještaj
Totuj spašen i namještaj

Usisač je krivac semu
Instalacije na njemu
Kakoj kuća ofarbana
Videli su drugog dana

Post traume Vladu guše
Va fajercag sada puše
Više ne zapira vrata
Nit koristi agregata

Da ne bude pizdarije
Sad pri petrolejki zije
Se akoj va kući zima
Neće ognja ni s kamina

TAMBUR

ABUKAT

Dečki su va Liči pili
Mesopusta popalili
Kakovaj to nova fora
Damira gren pitat Čora

Paradi ga on ostavlja
Kad Kričina se pozdravlja
Goranaj on zapal Mera
Ovo kodaj bilo čera

Mesopusta neće srića
Vezali ga na jugića
Goran vozi po Kričina
Pokazuje ga dičini

Nij sirene niti zvonca
Paradaj već u Antonca
Drli Goran od Kričini
Kroz Podgori do Dolčini

Prebrzo se jugo kreće
Nazad do Antonca neće
Zač preteška muj krivina
Ispod Borka Peričina

Neka se i ovo čuje
Još je tu i stup od struje
To Goranu nij po ćefi
Jugon ga po sridi trefi

Auto se totu zvrne
Mesopust od muki prdne
Teku selon nišća dica
Doli v brajdij podmornica

Se sej brzo raščistilo
Nikomure niš nij bilo
Goran tu nij niš najebal
Mesopust se ni ogrebal

Čaj zletela krama stara
Krivit oču „SKRETNIČARA“
Autoj još va Podgori
Ma će i on brzo k Bori

TAMBUR

SUDAC

„SKRETNIČAR“ mi diže živac
Za sej zlo jedini krivac
Ne poštuje to čaj sveto
Neće čekat novo leto

Cigani su pirovali
Kij dal ključ od naše sali
Dabog zadnju jil palentu
Kij va žepi strpal rentu

Nij se moglo spat od buke
Dalapi i tarabuke
Taman su pasali piri
Novo slavlje va Bribiri

Prišlaj v salu nova svita
Ljudi moji jel kraj svita
Malo su in škure lica
Al u curic vruća pica

Nij to rini teti Ani
Novoj vrime novi hani
V grobih su se okretali
Ki su ovaj dom zidali

Biloj evdi sakog slavlja
Sad pak puzdru se nazdravlja
Da stvar bude jače tiša
Obrizanog slave miša

V prvon redi s puno dice
Redon side se divice
A za njimi stoje lani
Redon muški obrizani

Običaj to nij z Bribira
Ni muzika ka se svira
Sunit tako vele Turci
Celi dom je sad va kurci

Samo slavi tuju slavu
Ma si uprav zgubil glaavu
Lista grihijh tij preduga
Vjetrenjače, sunit, pruga

Sjebal si nan pulitiku
Vinodolu krvnu sliku
Nećeš dugo još se patit
Za glavu te moran skratit

Da ne bumo tu do kasna
I porotaj jednoglasna
Bez žalbi ni prava glasa
Smrtna kazna istog časa

UDARAC SABLJUN

Lokalnaj pak pulitika
Kot padela starog mlika
Škorup skriva sprdačinu
I sramotu za općinu

Budžet ima črnu sliku
Opet vraćaju ga v Riku
Tamo vele evo čuda
Još je ludih odovuda

Ista slika kot i prije
Opet iste pizdarije
Ko to telo potpisuje
Črno neka mu se snuje

Mesopust mu zadnje veli
Neć ti dugo v našen seli
Ili troši il odjebi
Ili stari gloy ogrebi

Kad općina se pretresa
Potresu se i nebesa
Sveti Petar a i Paval
Zneli valje bi si čaval

Prišli doli bar na malo
Da zaštite čaj ostalo
Videli su jakoj tesno
Ostat livo – skrenut desno

Dal zalivat škrebut stari
I tonut va staroj slavi
Trunka vidi se tu spasa
Moj narode stel bez glasa

Mesopust je naš nebogi
Rekal komu smrde nogi
Dal do bosa zut vječnike
Ili samo poglavnike

Kad na vlasti budu drugi
Ote vraćat vaši dugi
Gradu našem lipotu
Da ostane na životu

TAMBUR

SUDAC

Tema dana nij pogovor
Kamo smestit sad kolodvor
Naprho moramo gljedat
Kako zdanje oće zgljedat

Uklapat se mora totu
Uz od kuli tu lipotu
Da ne bude kot va pakli
Se mora bit v jednon stkli

Toj posmrtna bila želja
Našeg lanjskog Graditelja
On će gljedat odozgora
Staklen krov od kolodvora

Pitanje se sad postavlja
Kadi ta vlak se ustavlja
Si mudruju v našen seli
Na šćoj će to bit parceli

Od Katlova pa do Drišća
Raste cena od zemljišća
Skuplje bit će na Slipicah
Nego Spliti na Bačvicah

Još će vajer skočit biž ća
Stari Guč i Pokojišća
Jedino te sjebat šini
Jebodrom na Duješini

Kolodvorska da će zgrada
Ulaz imit tu odzada
Strateška je to odluka
Ne od vlasti neg od puka

Za Bribir je to sad važno
Totu bit će uvik vlažno
Tati, flundri i metrese*
Kad gospodu put nanese

A za zahtjevniji fanti
Bitange i buzeranti*
Da beseda bude bliže
Njin na ženske se ne diže

Neka narod bude miran
Prvi vlak je rezerviran
Od Riki do našeg sela
Vagun, dva za Obersnela

„SKRETNIČAR“ mi veli sada
Da dočekat će parada
Kalmetu i Pankretića
Nadbiskupa Bozanića

TAMBUR

*buzeranti – onemoćali pederi

O P O R U K A

ABUKAT

Na bačvah su pukli dugi
Čaj ostavil on Udrugi
Kapetanon priležnice
I pol litre travarice

Kapelnikuj ostavina
Jedva dva apaurina
Kad bećari ga najade
Da čagod va grkljan klade

Paradi svojoj dičici
Metar nove trobojnici
I po glavi dva kurtona
Neka jebu bez pardona

Kapa Udrugi do poda
Pun dom opet ovdij moda
A onin ki zlo nan žele
Nek z Bribira se odsele

Pojila se nij još torta
Nacrt gotov je od športa
Velin van to još za dana
Dvoranaj to od megdana

Zdanje da ti pamet stane
Već mu išću bolje mane
Otel zlatni mališani
Kad dočekat bolji dani

Dal se Bribir kada pita
Čaj to kad si prvak svita
Parada ih sad pozdravlja
I želi in puno zdravlja

Pod doljnu stran, ne kraj Drinka
Pokazalaj noćna snimka
Noć ko v riti, daž ko s kabla
Od drva ne vidiš stabla

Kad na mosti kot aveti
Bože mili jel duh sveti
Konate tud bit će plača
Za pol noćun dva jebača

Jedan moćan, drugi malac
Klobučar i mladi jarac
Tajnaj vele tu do kraja
Kamo gredu praznit jaja

Kaj dobila tu spod repa
Doznat ćemo kad procveta
Ma ne znamo kij tu otac
Zač videli nismo kotac

Klobučaru on ostavlja
Kariolu punu zdravlja

Novi pleteni navlački
Za ov novi dom starački
Pol parade valje smira
Mesto tu da rezervira

Da dočeka zadnji dani
U Zlatana i Gordani
Oćel kletu babi stare
Skakat simo na mačkare

Još je jedno niklo zdanje
Cvjetarna od naše Sanje
„SKRETNIČAR“ joj sprotu veli
Lipše nij v nijednon seli

Va Podgori lipon seli
Vrnula sej doma Eli
Prišli ona i dičica
Sada doma nij Ivica

Nigdig on na tujen mori
Na železnomu vapori
Parada ga sad pozdravlja
Nikad ga ne zaboravlja

Va Afriki i na Kubi
Nek nabavi još dvi trubi
Dečki njemu se vesele
Čekaju ga gaće bele

Mesopust mu daje pijat
I paket čaš za razbijat
Neka hita neka zgaje
Za narodne običaje

Antoncu pak on Ivici
Vruće vodi v termosici
Da se valje stvar uredi
Kad mu kiler se zaledi

On, Vlatko i Kršul Frane
Vozili sa na tenane
Gorski kotar već se hvata
Kamion bez termostata

Vodaj smrzla na čistini
A i oni va kabini
Samo Franu neće kriza
V njemuj uvik antifriza

--

Još šalje i velu pusu
Rudinu Ivanu Tusu
V čoški kadi stal je često
Parada mu čuva mesto

--

Općini da manje pati
Još četiri abukati
Ne želi in niš on loše
Neg sav budžet da potroše

Načelniku šator veli
Nek rastre va svojen seli
Pa nek mu po celi dani
Tamo sviraju cigani

--

Željki Jurčić isto pusa
Dvi brnjice ne od gusa
Pa da još ovoga leta
Va posjetu pride teta

--

Zadnje riči već se hladi
Opet vraća se paradi
Njegovi su zadnji hropci
Veli pozdrav za si sopci

Više ih je nego lani
A manje su popišani
Manje zvrćaju se nogi
Ne gore po selu stogi

Pazte da se ne zatare
Mesopust i š njin mačkare
Zadnja rič va grlij stala
Još Hrvatska nij propala

Jel ostala ka z ormara
U našega „SKRETNIČARA“
I jel kakov biser novi
Doznat ćete na Čokovi

TAMBUR

Udruga za mesopusne običaje Bribir zahvaljuje svim sponzorima koji su pomogli u realizaciji ovogodišnjih mačkara, a posebno:

Općini Vinodolskoj

I

Turističkoj agenciji „KATARINA LINE“ Opatija